

Gvangjsih Minzcuz Bau

ganhhau: CN45-0036 B.2019 Nd.9 Ng.18 liggaueq geijhailh nienz ndwenbet ngeihcib

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3392期

Gaiq Daihcib'it Daengx Guek Siujsoq Minzcuz Cienzdoengj Dijyuz Yindungvei Hai Sat

Bonjbauq siusik (gicej Cau Dwzfeih Liengz Cingz) Ndwen 9 ngoenz 16 banhaemh, Gaiq Daihcib'it Daengx Guek Siujsoq Minzcuz Cienzdoengj Dijyuz Yindungvei haepmuqsik youq Cwngcouh Si Aulinz Bizgwz Dijyuz Cungsib banh, aen minzcuz yindungvei doxdax 9 ngoenz neix guhsat lo, gyoengq yindungyenz 34 aen daibyaujdonz, 56 aen minzcuz, youq Cwngcouh caez doxdax, gyaenak cingzgeih.

Youq gwnz gizdieg yindungvei doxdax, gyoengq yindungyenz gak cuz Gvangjsih youq mwh doxdax haenq-rengz buekguh, ceng' aeu mingz daeuz, mbouj lau boux ak, doxdax langhbaij bonjfaenh, doxdax ok suijbingz ndei,

langhbaij le gij yienghsiengq dijyuz daudwz ndei caeuq gij suijbingz doxdax ak, ciuq dajveh doxdax sat 13 aen hanghmoeg doxdax caeuq 8 aen hanghmoeg biujyienj, aeu ndaej 62 loh ciengj, ndawde it daengjciengj 10 aen, ngeih daengjciengj 25 aen, sam daengjciengj 27 aen, cienzboh ciengj mauhgyaq gaiq gonq (gungh 51 loh ciengj, ndawde it daengjciengj 4 aen, ngeih daengjciengj 18 aen, sam daengjciengj 29 aen), aeundaej gij cingzciak ceiq ndei daj bi 1991 Gaiq Daihseiq Daengx Guek Siujsoq Minzcuz Cienzdoengj Dijyuz Yindungvei doxdax haenx, gyau mbaw-gienj habhoz ndeu hawj Swcigih Dangvej, Cwngfuj caeuq daengx gih

gak cuz lwgminz.

Youq mwh haepmuqsik, aen cujvejvei Gaiq Daihcib'it Daengx Guek Siujsoq Minzcuz Cienzdoengj Dijyuz Yindungvei lij senhbu mingz-dan ndaej Gaiq Daihcib'it Daengx Guek Siujsoq Minzcuz Cienzdoengj Dijyuz Yindungvei daudwz fungh-sangciengj dem, Gvangjsih Daibyaujdonz goj miz mingz. Doxcomz 9 ngoenz, buekguh 9 ngoenz, angqhoh 9 ngoenz, riengz dwk singgo 《Haen-ciengq Guekcoj》 menhmenh ciengq sat, gaiq yindungvei neix hix hai sat lo. Hoeng cingz mbouj gat, dauqfanj eiq engq laeg, baez neix doxbiek dwg vihliux baez laeng doxcomz, bi 2023, Haijnanz doxraen moq!

SIUSIK DINJ

● Cungguek-Dunghmungz (Namzningz) couhcitheiq 9 nyied 12~18 hauh youq Namzningz banh. 19 aen heiqduenz maenhndei daj Cungguek, Vwnzlaiz, Genjbujcai daengj 9 aen guekgya daeuj haenx gonqlaeng yienj le 23 ciengz heiq, 15~18 hauh lij youq Namzningz Si Bozvuzgvanj banh le Cungguek-Dunghmungz cit-heiq nem feihvuzciz vwnzva yizcanj baijok nem baijyienj hozdung dem.

(Veiz Yingjinh)

● 9 nyied 15 hauh, ciengz hoihaemh ciengciengz doxyau vwnzva Cungguek, Hozlanz youz song guek bouxyienj doxgap yienj haenx youq gwnz daizheiq Namzningz Minzgohhuz yienj, raghai le mbawmuq baenzdauq vwnzlaiz vwnzva hozdung Namzningz Si angqhoh Cungguek moq laebbaenz 70 hopbi nem “daizfwen singz heu” 2019 Namzningz Gozci Minzgoh Yisuzcez. Ciuq cam rox, ciet guekgingq gaxgonq yaek miz baenz 20 baez yienjok hozdung laebdaeb youq Namzningz banh.

(Yiz Sienghczenz)

● 9 nyied 11 hauh, mwh ciet bet nyied cibngux yaek daengz seiz, Hocouh Si Minzcunghvej, fuzgyau hezvei, gihduh gyaudangzdiemj bae Bingzgvei Gih Swhdungh Cunh Lungzbingz guh camnai hozdung, soengq gij hohfuk ngoenzciat caeuq doxgaiq dij ngaenz 2 fanh lai maenz haenx hawj dangdieg 37 ranz ranzgungzhoj Yauzdoj; doengzseiz lij yienhciegz gien ngaenz 6000 lai maenz hawj gij vwnzlaiz gungzhoj Yauzdoj wng, hawj gyoengqde ndaej gvaq aen ciet angqyangz ndeu.

(Cau Ginhbinh)

● 9 nyied 13 hauh banhaemh, guekgya 4A gaep lijyouz ginggih Denzyangz Yen Denzcouh Singzgeq banh le bet nyied cibngux hoihaengduenz, yinx gyoengq saimbwk lauxnyaec cingq youq ndaw singzgeq yawj ronghndwen guh'angq haenx comz caenx dwk caeuqfaenh haeujbae, doxyaeng doxlwnh duenzdaej, yienhciegz nauhyied hoengghwd.

(Vangz Gozsun Vangz Li)

Vangz Sigi Vih Gvangjsih Daibyaujdonz Ciengj Ndae Aen It Daengjciengj Daih'it



Ndwen 9 ngoenz 13 banhaet, youq Gaiq Daihcib'it Daengx Guek Siujsoq Minzcuz Cienzdoengj Dijyuz Yindungvei bousai vaj faexndoeckdog 60 mij roensoh doxdax, Gvangjsih senjsouj Vangz Sigi daengz ceiq gonq, aeundaej it daengjciengj, neix dwg Gvangjsih Daibyaujdonz youq gaiq yindungvei neix ndaej aen it daengjciengj daih'it. Ndaw doz dwg Vangz Sigi hwnj daiz lingx ciengj.

(Cau Dwzfeih Liengz Cingz)

Namzningz Banh Angqhoh Cungguek Moq Laebbaenz 70 Hopbi Minzcuz Doxgiet Cawjdaez Hozdung

Bineix dwg Cunghvaz Yinzminz Gunghozgoz laebbaenz 70 hopbi, vih haeujlaeg hagsib hengz ndei Siz Ginbingz cungsuhgi gij cingsaenz lwnhgangj youqgaenj gvendaengz hong minzcuz, guhmaenh daezswng Namzningz Si gij cwngzgoj singz guhyienh minzcuz doxgiet cinbu, 9 nyied 12 hauh banringzgvaq, Namzningz Si Minzcunghvej youq Namzningz Gvangjbo Densidaiz yenjbohdingh banh le “Sigloux Va Hai Ceh Got-ndaet, Doengzsim Caez Caep Loq Cungguek — Angqhoh Cunghvaz Yinzminz Gunghozgoz Laebbaenz 70 Hopbi Minzcuz Doxgiet Cawjdaez Hozdung”. Si minzcuz gunghcoz lingj-dauj siujcuz cwngzyenz danhvei faenguenj lingj-dauj caeuq cizgungh daibyauj, gak yienh gih dungcanbu

(minzcunghgiz) lingj-dauj, gij danhvei guhyienh, minzcuz doxgiet cinbu mozfan danhvei caeuq bouxgag daibyauj aeundaej daengx guek, swcigih, Namzningz Si minzcuz doxgiet cinbu cauxlaeb hozdung haenx, cunghgyaugai daibyauj daengj baenz 400 vunz yienhciegz yawjgonz yienjheiq.

Cawjdaez hozdung aeu gagciengq, gofoux, doegsei, baijyienj ndangdaenj minzcuz, sinbinz dinj, saveh biujyienj daengj hingzsiak, ndeindiq yienh'ok le gij yiengh ndei Cungguek moq laebbaenz 70 bi gvaqdaej Namzningz ginghci, sevei, vwnzva hwngfat aeu-ndaej bienqvaq hungloet caeuq daengx si gak cuz yinzminz doxgyaenz lumj ranz vunz, doxdep caez doxbang, huzndei caemhyouq, doxbang dox-

coengh haenx, gikleih daengx si gak cuz yinzminz doengzcae coenghrenez hong minzcuz doxgiet, caepmaenh Cunghvaz minzcuz dox caemhdoengz yisiz, gyalai doxlieb doxyau dox-caeuq, lumj ceh maksigloux nei doxgot ndaetndiq youq giz ndeu, doengzcae bae raiz biencieng moq huzndei minzcuz doxgiet cinbu, hawj dujva minzcuz doxgiet youq singz Namzningz hoengh hai mbouj byaiz.

Baez hozdung neix doenggyaq Namzningz Gvangjbo Densidaiz “Namzningz Diuznduj” gwzhuduenh caeuq sinhvwnz cunghhoz binzdau guenfueng veihsin bingzdaiz caemh-seiz cigboq, hawj daengx si gak cuz yinzminz ndaej yawj cit heiq minzcuz doxgiet cinbu ndeiraeuh ndeu.

(Yenz Gingbingz/颜庆平)